



CH-7144 Vella, october 2021

Novitads dalla suprastonza communal Lumnezia

La suprastonza communal Lumnezia ha approbau las suandontas fatschentas.

Elecziun complementara cussegl da scola

Sco commember dil cussegl da scola Lumnezia ei vegnius elegius Gian Reto Derungs-Blumenthal da Vella.

Administraziun communal

Las plazzas dil canzlist communal e dil menader digl uffeci da baghegiar ein d'occupar enteifer igl onn 2022 muort pensiuns. Ils inserats per las plazzas ein publicai silla pagina d'internet dalla vischnaunca Lumnezia.

Il mandat cun la fundaziun inplus da Glion vegn sligiaus per la fin 2021 e Silvana Caviezel vegn engaschada sco emploiada dalla vischnaunca Lumnezia cun contract da lavur persunal naven digl 01-01-2022.

Tariffas d'aua pils onns 2021 - 2025

Las tariffas d'aua pils onns 2021 – 2025 vegnan salvadas sco tochen dacheu.

Affitaziun dalla habitaziun ell'emprema alzada dall'anteriura casa dil miedi

La hatibaziun ell'emprema alzada dall'anteriura casa dil miedi a Sumsiaras, Vella ei vegnida baghegiada ora per diever dall'Uniun Cumbiniala. La canorta d'affons e la meisa da miezgi per scolars che san buca ir a casa sur miezgi ein vegnidas aviartas igl uost 2021.

Surdadas incaricas da lavur

1. Tagls da lenna tenor program annual
 - Uaul da Sax, Camuns a Bruno Solèr, Uors
 - Uaul da Starpiu, Vrin a Leo Alig, Vrin
 - Uaul da Silgin, Lumbrein a Leo Alig, Vrin
2. Senda da velos e da viandar Alpetta – Alp Seglias
 - Lavurs d'impressari a Savoldelli Tanno SA, Vella
3. Sanaziun provediment d'aua Lumbrein-Vitg, lingias da provediment naven dil reservuar Planezzas entochen el vitg da Lumbrein.
 - Lavurs d'impressari a Collenberg SA, Lumbrein
 - Installaziuns sanitaras a Capaul GmbH, 7148 Lumbrein

Project Bike Trail Nino Schurter

Approbau il project e concediu il credit da CHF 300'000 per mauns dalla radunonza communal.

Marcau Daniev 2021

Sche la situaziun da corona lubescha, vegn il Marcau Daniev 2021 menaus atras ils 28 da december a Morissen. El cass che la situaziun d'infeziuns da corona semida considerablamein sto l'occurrenza vegnir annullada a cuorta vesta.

Scamond da schar ir fiugs artificials che caschunan canera

Da Silvester eis ei scumandau da schar ir fiugs artificials che caschunan canera. Quella pratica duei vegnir mantenida en general pil futur. Per quei motiv prenda la suprastonza communal en mira ina midada digl artechel art. 22 dalla Lescha digl uorden public dalla vischnaunca Lumnezia.

Midada dalla procedura per damondas da contribuziuns per projects

Damondas da contribuziun per projects han naven digl 01. da schaner 2022 da vegnir inoltradas sils 15 da mars, 15 da zercladur, 15 da settember e 15 da december, autramein vegnan ellas tractadas pér il proxim quartal. Reglaments ed informaziuns detagliadas ein d'anflar silla pagina d'internet dalla vischnaunca.

Contribuziuns concedidas il tierz quartal 2021:

- Alla Somedia Production per l'ediziun dil Calender Romontsch 2022
- A Gabriel Alig per l'ediziun dil cudisch "Erinnerungen"
- A Heinz Lüthi per la part en romontsch sursilvan dil cudisch "Murmelis grosses Abenteuer"
- All'Uniun tratga da biestga per l'exposiziun d'atun 2021 a Vella
- All'Uniun "Schichtwechsel – La Surselva" ei vegnida concedida la lubientscha da duvrar per l'exposiziun a Glion crappa da marmla ch'ei gia explotada dil Péz Serenastga, Quei en fuorma d'in emprest e cun l'obligaziun da returnar la crappa en in stan aschia ch'ella sa vegnir duvrada pil diever dalla vischnaunca suenter che l'exposiziun vegn baghegiada giu.

Tablas da scamonda d'access per tgauns avon ils santeris

Tenor artechel 8 dalla Lescha davart igl uorden public per la vischnaunca Lumnezia (111.100) ed artechel 11 dalla Lescha da sepultura e santeri per la vischnaunca Lumnezia (771.100) eis ei scumandau da prender tgauns els santeris. Excepiu da quei scamond ein tgauns da tschocs e tgauns d'assistenza.

La vischnaunca Lumnezia sco proprietaria dils santeris ha concediu alla vischnaunca da pleiv catolica-romana Lumnezia miez, Vella la lubientscha da montar tablas da scamond avon il santeri da Pleif a Vella. Tenor necessitad vegn la lubientscha extendida sil santeris en tut ils vischinadis.

Rendaquens finals

Approbaziun dils rendaquens finals per il suandonts projects

- Sanaziun lag da far bogn Davos Munts, Degen (pumpar ora il gliet)
- Midada d'intent center communal, Vignogn (per mauns dalla radunonza communal)
- Sanaziun dalla via cantunala Vrin, part Vrin – Sogn Giusep e dislocaziun dil conduct d'aua e las lingias da canalisaziun dil tschancun Resgia – Cons
- Suosta da posta Resgia Sura Val a Vattiz, Degen

Publicaziun parcelas da baghegiar

Las parcelas da baghegiar dalla vischnaunca Lumnezia, ch'ei aunc buca surbaghegiadas ein publicadas sut: <https://www.lumnezia.ch/rm/vischnaunca/habitar/parcelas-da-baghegiar-dalla-vischnaunca-lumnezia>.

Termins radunonzas communalas Lumnezia 2021 e 2022

17 da december 2021

18 da mars 2022

17 da zercladur 2022

16 da settember 2022

16 da december 2022